

# EAEG jadi gagasan Asean: PM

Daripada  
ZAI' JDDIN AYIP

JAKARTA: Datuk Seri Dr Mahathir Mo'hamad berkata cadangan Malaysia mengenai pembentukan Kumpulan Ekonomi Asia Timur (EAEG) akan dijadikan gagasan Asean, agar fungsinya lebih kuat dan mantap.

Menurut Perdana Menteri, Presiden Suharto menyetujui cadangan Malaysia itu dan seterusnya mencadangkan ia dijadikan cadangan seluruh negara Asean, bukan lagi Malaysia. BU

"Saya setuju dengan penda-

pat Presiden Suharto dan mulai hari ini saya umumkan sebagai usaha Asean," katanya dalam satu sidang akhbar sebelum berlepas ke Bali semalam.

Datuk Seri Dr Mahathir dan Presiden Indonesia itu berbincang selama 90 minit petang kelmarin, termasuk mengenai pembentukan EAEG dan hal-hal lain seperti projek pembangunan segitiga ekonomi Batam-Singapura-Johor.

Beliau berkata, perbincangan awal mengenai pembentukan EAEG akan diadakan di Bandung bulan ini sebelum dilanjutkan di Kuala

Lumpur.

Menurutnya, EAEG bukan blok perdagangan tertutup seperti yang didakwa sesetengah pihak sebelum ini. "Kami akan menjadikan kumpulan itu lebih terbuka dan bebas," katanya.

Datuk Seri Dr Mahathir berkata, semua negara Asean sudah bersetuju dengan pembentukan EAEG dan Malaysia sedang berusaha agar negara-negara Asia Timur mendo-kong konsep itu.

"Saya sudah mengadakan pertemuan tidak rasmi dengan pemimpin beberapa negara seperti Republik Rak-

yat China, Jepun dan Vietnam baru-baru ini.

"Saya dapati mereka tidak menolak walaupun belum menyatakan persetujuan. Saya yakin negara-negara itu akan bersetuju setelah diberi penerangan jelas," katanya.

Perdana Menteri berkata, struktur EAEG tidak terlalu ketat hingga menyekat perdagangan dengan negara-negara lain di dunia.

Asean, katanya, akan berca-kap dalam satu nada dan satu suara untuk meningkatkan perdagangan dan pelaburan dengan Asia Timur.

**LIHAT MUKA 2**

Malaysia,  
Indonesia  
BH 3 MAR 1991  
setuju  
tingkat  
dagangan

**DARI MUKA 1** ✕

Menurutnya, Amerika Utara dan negara Eropah sudah ada blok perdagangan tersendiri.

"Kita negara kecil dan tidak harus terlalu tunduk kepada negara besar.

"Untuk memastikan keadilan di segi perdagangan, kita harus mewujudkan suatu kumpulan bagi memastikan pasaran lebih terbuka," katanya.

Datuk Seri Dr Mahathir berkata, Malaysia dan Indonesia juga bersetuju meningkatkan perdagangan dua hala, termasuk mengenai sistem cukai dan kerjasama pemasaran bahan mentah.

Menurutnya, Malaysia dan Indonesia sudah mengadakan kerjasama sejak lama termasuk 'memerangi' dakwaan Amerika yang menyatakan minyak sawit mengandungi kolesterol yang boleh menyebabkan penyakit jantung.

Mengenai pemasaran bijih timah, Perdana Menteri berkata, kedua-dua negara juga menjalin kerjasama di segi pasaran dan penentuan harga.

"Malangnya, harga timah di pasaran dunia merosot dan Malaysia terpaksa menutup hampir 1,000 lombong bijih," katanya.

Perdana Menteri dan rombongan berlepas ke Bali hari ini untuk menghadiri suatu seminar mengenai Ekonomi Asean Menghadapi Cabaran Dunia.

Beliau juga akan berlepas ke Pulau Batam, Selasa ini.